

ISTÓRIA PSIKOLOJIA NIAN: KONSEITU KONA-BA PSYCHÉ (PARTE 1) RAZAUN NO EMOSAUN, MENTE NO ISIN

HISTORY OF PSYCHOLOGY: THE CONCEPT OF PSYCHE (PART 1) REASON AND EMOTION, MIND AND BODY

Alessandro Boarccaech

Professor convidado na Universidade Nacional Timor Lorosa'e

Recebido: 15 de maio de 2019
Aceito: 10 de setembro de 2019
Publicado: 17 de novembro de 2019

ISTÓRIA PSIKOLOJIA NIAN: KONSEITU KONA-BA *PSYCHÉ* (PARTE I) RAZAUN NO EMOSAUN, MENTE NO ISIN

Alessandro Boarccaech¹

Rezumu: Artigu ida-ne'e nu' dar parte dahuluk hosi estudu kle'an ida ne'ebé analiza kona-ba konseitu *psyché* no ninia relasaun ho siénsia psikológika sira. Iha parte dahuluk ida-ne'e (ne'ebé hamutuk parte tolu), ha'u apresenta mitu-gregu nian kona-ba Eros no *Psyché*, nune'e mós fó panorama hosi hanoin hirak-ne'ebé maihosi Sócrates, Platão, Aristóteles, Avicena, São Tomás de Aquino no Descartes kona-ba konseitu *psyché*. Importante tebes atu ita hatene istória hosi konseitu *psyché* atu ita bele komprende debate sira psikolojia moderna nian kona-ba relasaun entre mente, kakutak no isin, razaun no emosaun, subjektivu no objetivu. Autór sira ne'ebé temi iha artigu ida-ne'e iha hanoin la hanesan kona-ba huun ba konseitu *psyché* nian, no kona-ba ninia lala'ok oinsá. Maibé, sira hotu konkorda katak *psyché* nu'udar buat ida-ne'ebé fornese vida/moris, movimentu no iha ligasaun ho kapasidade rasiósiniu nian, razaun no intelektu. Liu de'it hosi hatene didi'ak kona-ba *psyché* mak ita bele komprende motivasaun no kauza sira hosi ita-nia emosaun, hanoin no hahalok. Ho nune'e, hodi hatene ita nia an didi'ak, ka hodi hetan autokoñesimentu, tenkesér liuhosi análise, pensamentu lójiku no autoreflesaun.

Liafuan-xave: Istória psikolojia nian; *psyché*; hatene ita nia an; autokoñesimentu; mitolojia; razaun no emosaun.

HISTORY OF PSYCHOLOGY: THE CONCEPT OF PSYCHE (PART I) REASON AND EMOTION, MIND AND BODY

Abstract: This article is the first part of a larger study where I analyze the concept of *psyché* and its relation to the psychological sciences. In this first part (out of a total of three) I present the Greek myth of Eros and *Psyché*, as well as an overview of the ideas of Socrates, Plato, Aristotle, Avicenna, St. Thomas Aquinas and Descartes on the concept of *psyché*. It is important to know the history of the concept of *psyché* so that we can understand the debates of modern psychology about the relationship between mind, brain and body, reason and emotion, subjective and objective. The authors covered in this article have different understandings of the term's origins and how it works. However, they agree that the *psyché* is something that provides life, movement and is associated with thinking capacity, reason and intellect. Only

¹ Profesór iha Universidade Nasionál Timor Lorosa'e.
<https://doi.org/10.53930/27892182.dialogos.4.62>

by understanding the *psyché* can we understand the motivations and causes of our feelings, thoughts and behaviors. In this way, self-knowledge would be possible through analysis, logical thinking and self-reflection.

Keywords: history of psychology; *psyché*; self-knowledge; mythology; reason and emotion.

Psikolojia, nu'udar área koñesimentu sientífiku, mosu ofisiálmente iha metade-ikus sékulu XIX nian. Wilhem Wundt hari'i, iha tinan 1879, Laboratóriu Psikolojia Esperimentál iha Leipzig, Alemaña. Tinan 11 tuirmai, iha 1890, William James fó sai tiha livru ida kona-ba *Os princípios de Psicologia* iha Estadus Unidus. Maske autór sira seluk mós hala'o hela peskiza kona-ba psikolojia, autór ruarua sira ne'ebé refere iha leten mak fó influénsia boot liu iha tempu ne'ebá, tanba sira hahú sistematiza no haketak psikolojia sientífika hosi psikolojia metafízika (Abib, 2009; Schultz, 2016).

Hahú hosi ne'ebá, psikolojia sai tiha siénsia plural, liuhosi mosu korrente teórika barak (esperimentál, komportamentál, *gestalt*, umanismu, *sistémica*, analítika, psikanálize, kognitiva, no hirak seluk) ho tan téknika, métodu, prosedimentu no área sira atusaun profisionál nian oi-oin. Ohin-loron, Psikolojia bele defini hanesan siénsia ne'ebé estuda hahalok, subjetividade ema nian no prosesu mentál sira. Nune'e, psikolojia, enjerál, entre ninia objetivu sira ne'ebé iha, ida mak buka atu hatene kauza no motivasaun sira hosi ita-nia hahalok, sentimentu, hanoin, hakarak, linguajen, matenek/intelijénsia, memória, julgamentu, atensaun, aprendizajen, rasiosíniu no personalidade.

Espresaun psikolojia mai hosi liafuan rua hosi lian gregu: *psyché* no *logos*. Liafuan *logos* signifika teoria, tratadu, estudu. *Psyché* (anima iha Latin) asosia ho alma ka klamar. Iha sékulu barak nia laran, liafuan *psyché* hetan interpretasaun no signifikadu oioin, nu'udar ezemplu, huun ba moris, razaun, ha'u, intelektu. Nune'e, signifikadu ba liafuan klamar iha psikolojia la'ós hanesan ho teolojia no relijiaun sira nian. Artigu ida-ne'e hanesan parte dahuluk hosi estudu luan ida, ho parte hamutuk tolu, ne'ebé ha'u halo hodi analiza kona-ba konseitu *psyché* no ninia relasaun ho siénsia psikolójika. Iha parte dahuluk ida-ne'e, ne'ebé sei apresenta tuir mai, ha'u analiza signifikadu atuál

hosi espresaun *psyché*, ninia orijen no mudansa signifikadu sira durante sékulu barak nia laran. Ba ida-ne'e, ha'u apresenta análise ida kona-ba mitu Eros no Psyché, nune'e mós hanoin sira hosi Sócrates, Platão, Aristóteles, Avicena, São Tomás de Aquino no Descartes.

MITU KONA-BA EROS NO PSYCHÉ

Mitu sira importante tebes ba Psikolojia, tanba sira fó-sai lójika, signu no valór sira sosiedade ida nian. La'ós ne'e de'it, mitu sira nu'udar metáfora ba saída mak akontese iha ita-nia moris. Mitu kona-ba Eros no Psyché mosu dala uluk iha sékulu II hafoin Kristu (h.K.), iha livru Metamorfoses (ka O Asno de Ouro) hosi eskitór no filózofu Lúcio Apuleio (Madaura 125 h.K. – Cartago 180 h.K.). Istória dehan hanesan tuirmai:

Liurai ida iha oan feto na'in-tolu. Oan feto-ki'ik naran Psyché nu'udar joven ida-ne'ebé bonita tebes no ema hosi rain oioin halo viajen hodi mai admira ninia beleza ne'e. Afrodite (deuza ba beleza, domin no seksualidade) sente laran moras ho Psyché tanba ema adora liu Psyché duké nia. Entaun, Afrodite husu ba nia oan Eros (deuz ba domin, paixaun no erotizmu) atu tiru Psyché ho ninia rama-oan-domin (ne'ebé halo ema laran monu ba malu) no halo Psyché laran monu ba ema ida-ne'ebé aat liu no la iha liu dignidade iha mundu.

Eros sai hosi Olimpo (fatin ne'ebé deuz sira hela ba) no lori bee masa rua, bee masa ida nu'udar bee-moruk no bee iha masa seluk bee-midar. Nia la'o to'o fatin ne'ebé Psyché hela ba. Bainhira tama iha Psyché nia kuartu, Psyché toba hela, entaun nia fakar bee-moruk ba Psyché nia ibun. Bainhira Eros prepara hela atu lansa ninia rama-oan-domin, nia haree ba Psyché nia oin. Psyché hakfodak hadeer, maibé nia la haree ema ida tanba Eros invizivel hela. Eros hakfodak no hakanek nia an ho ninia rama-oan-domin rasik. Nune'e, nia laran monu ba Psyché no nia fakar bee-midar ba Psyché nia fuuk.

Tempu tuirmai, Psyché nia biin sira kaben ho prínsipe sira, maibé Psyché la konsege hetan mane ida atu sai nia laen. Mane sira hakarak admira nia de'it, maibé ta'uk atu hakbesik an ba nia tanba nia bonita loos. Psyché

nia inan-aman preokupa tebes ho sira-nia oan tanba sei klosan hela, entaun sira ba hasoru orákulu Apolo nian iha Mileto. Deuz Eros dehan ba Psyché nia inan-aman liuhosi orákulu ne'e atu lori Psyché ba foho aas ida atu sakrifika nia iha ne'ebá hodi kaben ho monstu ida. Hafoin lori Psyché ba foho ne'e, sira husik nia mesak iha-ne'ebá, nia ta'uk no tanis. Zéfiro (deuz ba anin-loromonu) lori semo Psyché ba fatin ida-ne'ebé kalma no nakonu ho ai-funan. Besik iha fatin ne'e, iha ai-laran ida ho ai mesak aas de'it. Psyché la'o liu hosi ai-laran ne'e no haree bee-matan ida-ne'ebé moos no kastelu bonitu ida. Nia tama ba kastelu ne'e no rona lian balu. Lian sira-ne'e haksubar-an no dehan ba Psyché katak sira Psyché nia atan no sira iha-ne'ebá atu halo buat hotu ne'ebé Psyché hakarak. Nia hahú moris iha kastelu ne'e no buat hotu ne'ebé nia hakarak lian sira mak halo hotu. Lian sira prepara hahán, hamoos, toka instrumentu múzika no halo buat hotu ne'ebé nia husu. Psyché iha buat hotu ne'ebé nia hakarak maibé nia la haree ema ida, nia rona de'it mak lian sira.

Kalan-kalan Psyché hasoru nia laen, maibé nia la haree nia laen tanba nia subar an iha nakukun laran. Maske la haree, mane ne'e laran-di'ak tebes no iha lian ne'ebé furak. Nia laen dehan katak nia lakohi Psyché hadomi nia ba ninia oin-di'ak, maibé tanba ninia an.

Iha tempu balu nia laran Psyché moris haksolok, maibé loran ida nia sente saudade ba ninia família. Ninia família hanoin katak nia mate ona. Psyché sente hanesan prizioneiru ba kastelu ne'e. Entaun nia husu ba nia laen atu hasoru ninia família. Laen konkorda, maibé dehan ba nia atu la bele rona konsellu hosi ninia biin sira. La'ós ne'e de'it, nia dehan ba Psyché atu la bele konta ba nia biin sira sé mak ninia laen no katak nia isin-rua hela. Deuz Zéfiro lori Psyché nia biin sira ba iha kastelu. Sira hetan malu dala barak. No ikus mai, Psyché ko'alia ba nia biin sira katak nia laen laran di'ak tebes no nia isin-rua hela. Entaun, Psyché nia biin sira sente laran moras no dehan ba nia katak ninia laen monstu ida karik tanba lakohi hatudu ninia oin. Sira fó hanoin fali katak uluk orákulu dehan katak nia sei kaben ho monstu ida. Sira mós dehan katak monstu ne'e fó han nia hodi ikus mai han fali nia. Psyché esforsu atu la tau atensaun ba buat hirak-ne'ebé nia biin sira dehan, maibé ikus mai nia preokupa loos.

Kalan ida Psyché prepara tudik no ahi-oan. Bainhira nia laen toba hela, nia hakbesik ba hodi haree nia oin. Nia haree katak ninia laen ne'e mak deuz Eros, joven no bonitu tebes. Nia haree mós ba kilat sira nia laen nian.

Nia haree rama-oan-domin no, bainhira kaer rama-oan-domin ne'e, la kuida nia hakanek nia an. Nune'e, Psyché mós laran monu ba Eros. Maibé, bainhira haree ninia laen nia oin, mina-manas turuk ida monu ba Eros nia kabaas. Sente moras, Eros hakfodak hadeer no semo halai sai liuhosi janela. Eros dehan katak sira la bele moris iha domin nia laran wainhira deskonfia malu no, tanba Psyché la fiar nia, sira tenke fahe malu. Bainhira Eros bá tiha, kastelu mós lakon no Psyché fila hikis ba ninia inan-aman nian uma. Nia biin sira dehan katak sira triste maibé loloos ne'e sira haksolok haree Psyché terus. Psyché triste tebes ho fahe malu ho nia laen no nia koko atu oho an liuhosi soe an ba tasi, maibé laloran sira lori nia mai fali rai maran. Entaun, Pan (deuz ba ai-laran, kampu no bibi-atan sira) haree-hetan Psyché no dehan ba nia atu haluha buat hotu no koko atu manan fali Eros nia laran. Psyché nia biin sira nonok-nonok bá to'o foho no bolu deuz anin nian, Zéfiro, no sira soe an hosi foho, maibé deuz anin nian la mai no sira monu hosi foho no mate.

Psyché desidi tiha atu manan fali Eros. Nia la'o haleu mundu hodi hasoru fali nia laen doben. Loron ida, nia hetan templu ida iha foho aas ida. La iha ema ida mak iha fatin ne'ebá no buat hotu runguranga. Haree ba runguranga ne'e Psyché desidi hadia tiha. Deméter (deuza ba kolleita, agrikultura no estasaun sira tinan-nian) mak nu'udar na'in ba templu ne'e, deuza ne'e apresia ba ajuda ne'ebé Psyché fó. Atu selu fali laran-di'ak Psyché nian, Deméter ajuda fó hanoin ba Psyché atu bá templu Afrodite nian hodi hato'o omenajen no hatudu respeitu ba deuza ba beleza no domin ne'e.

Afrodite hirus tebes Psyché tanba halo nia oan la respeitu nia no agora toba iha kama ho sente triste no ho moras ahi-han nian iha ninia kabaas. Atu perdua Psyché, Afrodite haruka nia tenke halo servisu balu. Servisu dahuluk mak atu hafahe batar-musan boot sira hosi musan ki'ik molok kalan to'o. Servisu ida-ne'e imposivel tebes atu kumpri iha tempu badak nia laran. Maibé nehek ida hakbesik ba Psyché hodi ajuda nia liuhosi bolu ninia kolega sira atu finaliza servisu ne'e. Iha de'it minutu balu nia laran servisu ne'e ramata tiha.

Servisu daruak mak bá to'o ai-laran ne'ebé besik ba mota ida. Iha fatin ne'ebá iha bibi-malae sira ho fulun osan-mean. Psyché tenke tesi bibi-malae hotu nia fulun sira no lori ba Afrodite. Bainhira to'o iha mota, Psyché desidi atu tama ba mota laran no ba hasoru bibi-malae sira. Maibé du'ut ida ne'ebé moris iha bee laran ka junco ida fó atensaun ba nia atu la bele tama ba mota tanba korrente-bee nia maka'as hela no nia bele mout mate. Alende ne'e,

bibi-malae sira bele ataka nia no oho nia. Nune'e, Psyché hein, bainhira korrente-bee nia neineik ona no bibi-malae sira deskansa ona mak Psyché tama ba mota no tesi bibi fulun sira hodi lori ba Afrodite.

Servisu datolu mak ba kuru bee iha bee-matan ida iha foho aas. Maibé iha dalan klaran iha monsturu perigozu ida. Psyché hetan tulun hosi manu-makikit ne'ebé lori nia semo ba foho leten ho seguransa. Servisu dahaat mak tuun ba mundu iha rai okos hodi husu ba Perséfone (deuza ba duut, ai-funan no ai-fuan) atu fó ninia beleza balu. La hatene ho saída mak atu halo, Psyché sae tiha ba torre aas ida no soe an tun atu bele to'o ba mundu iha rai okos (mundu ema mate nian, ne'ebé deuz Hades mak governa). Maibé lian ida mosu mai no impede nia atu oho an no esplika ba nia dalan sira atu ba mundu rai okos. Psyché halo tuir instrusaun sira no, hafoin manan tiha susar sira, nia konsege hasoru Perséfone. Deuza Perséfone tau nia beleza balu iha kaixa ida no dehan ba Psyché atu la bele haree ba kaixa laran. Nune'e tanba deuza sira-nia beleza ema labele haree. Iha dalan fila nian, Psyché sente kuriozu no hakarak haree saída mak iha kaixa laran, nia loke kaixa no haree katak la iha buat ida iha kaixa laran, maibé iha dukur-kle'an. Psyché sente dukur no toba tiha.

Eros nia kanek di'ak ona no nia tun ba mundu rai okos atu salva ninia doben. Eros tau fali dukur-kle'an iha kaixa no dehan ba Psyché atu lori ba fó Afrodite, atu kumpri nia tarefa ikus ne'e. Iha tempu hanesan, Eros ba ko'alia ho Zeus (deuz ba lalehan no rai-lakan, aman ba deuz sira no nu'udar autoridade másima ba deuz sira) atu ajuda Psyché. Zeus husu ba Hermes (deuz ba viajen, komunikasaun, astronomia, na'ok-teen sira, majia, diplomata, no matadalan ba klamar sira hodi ba mundu rai-okos) atu lori Psyché ba deuz sira-nia sorumutu iha Olimpo. Psyché hemu tiha bebida deuz sira-nian ida (ambrósia) no nia sai ema-imortal (ema ne'ebé nunca mate). Eros no Psyché kaben malu no sira iha oan-katoluk: Eros II (deuz ba ema-mane sira nia domin), Hedone (deuza ba virtude sira) no Voluptas (deuz ba prazér sira).

Liafuan *psyché* iha gregu signífika iis moris nian (sopro de vida), ka forsa vital, maibé bele signífika mós kukulai. Kukulai ka borboleta iha signífikadu interesante tanba nia mosu hosi lakataru ida ne'ebé, hafoin período inkubasaun, hetan moris liuhosi ilas borboleta. Ida-ne'e bele relasiona ho reflesaun, introspeasaun no transformasaun ba ita-nia moris. Ho de'it filozofia, liuhosi

Pitágoras no liuliu ho Sócrates, mak *psyché* hetan signifikadu alma/klamar, esénsia ka hun ba moris ema umanu nian. Mitu ne'ebé temi iha leten iha signifikadu simbóliku, entre signifikadu hirak-ne'e balu mak:

a) Ema admira *Psyché* tanba ninia beleza, maibé la iha ema ida mak hakbesik an nia no obriga nia kaben ho monsturu ida. Ne'e dehan katak ema bele valoriza aparénsia, isin liur, maibé la haree ba ema nia laran.

b) Eros nu'udar deuz ba dezeju, domin, sentidu lima sira, no nia gosta halo runguranga no laiha responsabilidade. Bainhira nia laran monu ba *Psyché*, nia komesa iha responsabilidade no hahú preokupa ho ema seluk. Ne'e bele dehan katak ita bele domina no kontrola ita-nia dezeju no sentimentu rasik.

c) Lian sira iha kastelu mak serve *Psyché* no halo tuir buat hotu-hotu ne'ebé nia hakarak. Lian sira ne'e dada lia ho *Psyché*, maibé nia nunka bele haree sira. Ne'e bele relasiona ho lian-interiór (iha dalen Indonézia-nian dehan suara hati), ita-nia neon ka konxiénsia, hanoin, ideia hirak-ne'ebé mosu iha ita-nia laran.

d) *Psyché* hasoru nia laen iha kalan de'it, molok toba, iha nakukun nia laran. Ne'e bele relasiona ho momentu sira ne'ebé ita lakon konxiénsia, razaun, no momentu sira-ne'ebé ita mesak, laho avaliasaun/sensura hosi ema seluk, nune'e ita bele livre no iha haksolok.

e) *Psyché* nia biin sira bele foti hanesan ezemplu kona-ba hanoin negativu, laran-moras no influénsia aat sira ne'ebé ema seluk fó ba ita. Ne'e mós bele fó hanoin katak dala ruma ita valoriza liu hanoin ema seluk nian duké ita-nian rasik.

f) Servisu sira-ne'ebé Afrodite fó ba *Psyché* bele signifika: 1) hafahe batar musan sira asosia ho ita-nia kapasidade hodi organiza, hili no hafahe buat hotu-hotu; 2) Tesi bibi-malae nia fulun asosia ho korajen, hasoru ta'uk; 3) manu-makikit bele liga ho hanoin ne'ebé ass, kapasidade atu hetan solusaun no hanoin abstratu; 4) loke kaixa signifika repete nafatin sala ne'ebé halo ona iha pasadu. *Psyché* uluk iha kedas komportamentu ka asaun ne'ebé la loos maibé, maske nune'e, nia repete sala sira ne'e nafatin.

g) Fila ba inan-aman nia uma bele asosia ho haree fali ba pasadu no analiza fali saida mak ita halo ona.

h) Maske hale'u ho riku-soin no ho atan sira atu halo tuir nia hakarak, Psyché sente mesak no triste iha kastelu. Ida ne'e bele signifika nesesidade ema nian atu moris hamutuk iha grupu. Ema nu'udar 'animál sosiál'.

i) Adora deuz sira, abandona templu, ta'uk ba kastigu deuz nian bele representa relasaun ne'ebé ita estabelese ho relijiun, ho sobrenatural no ho buat ne'ebé lulik.

j) La'o haleu mundu hodi buka Eros bele signifika ita-nia mehi, dezeju, buka realiza mehi rasik sira, difikuldade sira-ne'ebé ita hasoru iha moris.

Iha aspetu interesante oioin iha istória Psyché nian, maibé sira-ne'ebé ha'u hato'o iha-ne'e mak bele ilustra liu relasaun entre mitu ho psikolojia. Psyché nia istória iha simbolizmu ida ne'ebé representa prosesu dezvoltamentu pessoal ema sira-nian, hosi labarik ba ema boot, deskoberta ne'ebé hetan iha moris tomak, problema no difikuldade sira ne'ebe ita hasoru, desizaun susar sira, sentimentu domin no laran-manas, laran-moras no gratidaun, arrependimentu no kulpa, ta'uk ba buat ne'ebé ita lakoñese no ta'uk mate, dúvida no serteza sira ne'ebé ita iha, motivu ba ita-nia hahalok sira, prosesu aprendizajen nian, aleinde fó hanoin kona-ba konseitu sira sosiedade nian hanesan moras no saúde, buat ne'ebé réal no fantazia, kona-ba aparénsia no valór sira ema ida-idak no sosiedade ninian, ho sst. Psikolojia estuda asuntu sira-ne'e hotu. Hodi hatene didi'ak kona-ba signifikadu konseitu *psyché* iha Psikolojia moderna, ita tenke hatene ninia istória no evolusaun, ne'ebé mai hosi filozofia. Tuirmai, ita sei haree ida ne'e.

SÓCRATES NO BUKA SABÉR

Sócrates moris iha sidade-estadu grega Atenas nian iha 470/69 molok Kristu (m.K.) no mate iha 399 m.K. Maske ninia teoria sai koñesidu, filózofu hosi Atena ne'e nunca hakerek livru ida. Buat ne'ebé ita hatene mak ninia hanoin sira hakerek hosi ninia disípulu sira, mak hanesan Platão no Xenofante. Sócrates nia aman mak Sofronisco, nu'udar eskultór, no ninia inan mak Phaenarete, nu'udar parteira profesionál ida, iha probabilidade boot katak

Sócrates la hatene lee no hakerek. Ne'e tanba iha ninia tempu, ema ne'ebé bele lee no hakerek mak ema riku sira de'it. Bainhira Sócrates atu fó-sai ninia ideia no hanorin ema sira, nia bain-bain ko'alia iha *ágora* – prasa pública.

Preokupasaun sentrá filozofia Sócrates nian mak haka'as an atu hatene/ buka sabér. Sócrates afirma katak atu hetan koñesimentu ita presiza atu admiti ita-nia ignoránsia rasik. Sein ida-ne'e, koñesimentu hotu-hotu ne'ebé ita hetan sei mai hosi iluzaun no lia-loos falsu. Sócrates utiliza *método dialético* atu hatudu ho rasonál falla sira ne'ebé mosu iha argumentasaun, inkongruénsia no atu lori ninia alunu/interlokutór sira ba matenek, koñesimentu no hanoin luan. Métopu ida-ne'e bele fahe ba parte tolu: *ironia*, bainhira mestre finje la koñese asuntu atu alunu sira bele ko'alia ho livre kona-ba saida mak sira hanoin; *refutação*, bainhira mestre kontesta opiniaun sira alunu nian, hatudu pontu fraku sira iha sira-nia argumentasaun; no *maiêutica*, bainhira alunu kestiona ninia serteza rasik no hari'i rasik ninia koñesimentu.

Maiêutica nu'udar analojia ida ba servisu parteira sira-nian, ne'ebé Sócrates uza liuhosi pergunta simples sira atu ajuda ema seluk hetan koñesimentu/sabér. Ba Sócrates, ema hotu-hotu iha koñesimentu iha sira-nia an rasik, maibé la konsege hetan mesak. Nune'e, liuhosi *maiêutica* ita bele reflète, duvida no analiza ita-nia serteza rasik hodi ita bele to'o ba koñesimentu ne'ebé eziste ona iha ita-nia an.

A minha arte obstétrica tem atribuições iguais às das parteiras, com a diferença de eu não partejar mulher, porém homens, e de acompanhar almas, não os corpos, em seu trabalho de parto. [] Neste particular, sou igualzinho às parteiras: estéril em matéria de sabedoria, tendo grande fundo de verdade a censura que muitos me assacam, de só interrogar os outros, sem nunca apresentar opinião pessoal sobre nenhum assunto, por carecer, justamente, de sabedoria. (Platão, 2000, p. 47).

Iha Sócrates nia tempu, filozofia barak liu mak preokupa kona-ba *natureza das coisas*, ka natureza sasán nian, Sócrates buka atu komprende *natureza dos homens*, ka ema nian. Sócrates nia krítika sira dirije liu ba sofista sira. Liafuan sofista mai hosi espresaun *sophistes* ne'ebé mai hosi liafuan *sophia* ka sabedoria. Sofista sira preokupa ho ensinamentu prátiiku sira kona-ba oratória no argumentasaun. Ba sofista sira, lia-loos ne'e la'ós ida de'it, maibé iha lia-loos

barak. Tuir pensadór sofista Protágoras, ‘ema mak medida ba buat hotu-hotu’, ka, ema ida-idak iha ninia lia-loos rasik. Sofista sira husu osan hodi hanorin sira-nia koñesimentu ba ema no afirma katak ema sesé de’it bele argumenta kona-ba kualkér asuntu. Tuir sira ne’ebé kritika sofista sira, sofista sira nia objetivu la’ós atu koñese ‘lia-loos’ ka *natureza das coisas*, la’ós preokupa ho konteúdu, maibé haree de’it ba forma no buka argumentu (la importa se lia-loos ka falsu) atu manán debate.

Maibé, ba Sócrates, atu ita koñese ita-nia an rasik, ita presiza hatene *psyché*, ka ema nia klamar. Sócrates utiliza *psyché*/klamar hanesan ‘ha’u’ no ‘koñesimentu’, ka fatin ne’ebé rai ita nia hanoin, neon, razaun no baze desizaun morál sira. Nune’e, enkuantu isin hanesan instrumentu, superfisiál no tuir tempu ka temporál de’it, *psyché* nu’udar kauza ba movimentu, esénsia/huun no imortál (ne’ebé nunca mate).

Fraze ‘hatene ó-nia an rasik’ sai nu’udar sélebre no hatudu preokupasaun Sócrates nian hodi buka koñesimentu. Fraze ida-ne’e hakerek iha odamatan iha *Oráculo de Delfos*, ne’ebé dedika ba deuz gregu Apolo, deuz ida ne’ebé mak, ba ema gregu sira, hanesan responsável ba naroman, lia-loos no koñesimentu. Platão mós atribui fraze ida-ne’e ba Sócrates tanba representa buka tuir lia-loos, autokoñesimentu no koñesimentu kona-ba mundu ne’ebé haleu ita. Ba Sócrates, ema nia esénsia mak ninia *psyché* no, tanba ida-ne’e, liuhosi de’it entende *psyché* mak ita bele bá to’o virtude, sabedoria, no hatene buat aat no di’ak, loos no sala.

Não faço outra coisa a não ser convencer-vos, jovens e velhos, de que não deveis vos preocupar com o corpo, nem com as riquezas, nem com qualquer outra coisa antes e mais que com a alma, a fim de que ela se torne excelente e muito virtuosa. (Platão, 2000, p. 82).

Maske Sócrates tau prioridade ba hatene didi’ak ‘klamar’, la’ós de’it Sócrates mak koko atu hatene ‘klamar’ nia signifkadu. Asuntu ida-ne’e sai hanesan debate naruk loos iha istória filozofia nian (haree Platão, 2000; Aristóteles, 2001). Maibé, hahú husi Sócrates mak mosu tiha mudansa ba paradigma iha *psyché*/klamar, tanba *psyché*/klamar sai tiha objetu ba investigasaun sira no asosia ho razaun, ho ema nia laran/interioridade, no autokoñesimentu.

PLATÃO: MUNDU SENTIDU NO MUNDU IDEIA SIRA NIAN

Platão (428/27-347 m.K.), nu'udar oan hosi família nobre sira-nian ida, ne'ebé iha influénsia polítika no poder ekonómiku boot iha sidade Atenas. Ninia aman mak Ariston no nia inan mak Perictione, nu'udar desendente liurai nian nomós polítiku sira iha Atenas. Tan nune'e, Platão hetan eduka-saun di'ak liu iha ninia tempu, halo mós atividade desportu no partisipa iha jogu olímpiku. Platão nia naran loloos mak Aristócles, maibé hetan alkuña Platão, ne'ebé signifika 'kabas naruk'. Bainhira ho idade tinan 20, Platão rona palestra balu ne'ebé Sócrates hato'o iha prasa pública. Entaun, Platão desidi estuda filozofia. Ida-ne'e halo nia desiste tiha hosi sai polítiku – hanesan ninia família hakarak –, no sai fali disípulu ida ba Sócrates. Platão estuda hamutuk ho Sócrates durante tinan ualu no, hafoin Sócrates mate, Platão viajen barak no hala'o servisu iha sidade lubuk ida. Bainhira nia tinan 40, nia hari'i *Academia* iha Atenas, ne'ebé nia hanorin alunu sira no dezenvolve ninia investigasaun filozófica sira. *Academia* hari'i iha 387 m.K. no dura to'o 529 h.K. – kuaze tinan 800. *Academia* sai nu'udar sentru prinsipál ne'ebé filzófufu barak ba estuda, inklui mós Aristóteles.

Liuhosi komprensaun ontolójika no dualista realidade nian, Platão hanoin katak eziste *mundo inteligível* no *mundo sensível* (*Physis*). *Mundo inteligível* nu'udar mundu ba ideias inata, imutável, imortal no labele hetan liuhosi sentidu lima sira. Iha sorin seluk, *mundo sensível* governa hosi ita-nia sentidu sira. Informasaun ne'ebé ita simu no elabora liuhosi sentidu sira (tatu, olfatu, gustasaun, audisaun no vizaun) bele habosok ita rasik no muda hela de'it. Ho nune'e, realidade la'ós iha mundu fíziku no hahalok sira no buat hotu-hotu ne'ebé ita haree no sente sai hanesan superfisiál no iluzaun de'it. Sentidu sira altera realidade no liuhosi pensamentu rasionál, ne'ebé bele hetan de'it bainhira hala'o dialétika no reflesaun lójika, mak ita bele husik paixauun sira hodi nune'e revela esénsia ema nian no signifkadu loloos hosi mundu ne'ebé haleu ita.

O que há é o seguinte, pois é preciso coragem para dizer a verdade. A essência que realmente existe é sem corpo e sem forma, impalpável e só pode ser percebida pelo guia da alma, o intelecto, sobre ser o objeto do verdadeiro conhecimento, tem aqui sua sede. (Platão, 2000, p. 72).

Tuir Platão, iha divizaun entre *soma* (isin) no *psyché* (klamar). Isin pertense ba mundu sentidu nian no hanesan prizaun ba *psyché*/klamar, ne'ebé maihosi mundu ideias. Ba Platão *psyché* nu'udar fonte ba movimentu hotu-hotu no pensamentu nian. Platão dezenvolve ninia teoria kona-ba klamar, nia propoin konsepsaun ida ba *psyché tripartida* (fahe ba parte tolu). Atu ilustra ninia konsepsaun, nia apresenta alegoria (modu indiretu atu representa buat ida) mane lori karruajen ida ho kuda rua. Personajen tolu ne'e reprezenta parte sira klamar nian, ne'ebé mane ne'e nu'udar razaun, kuda ida nu'udar enerjia morál no kuda ida seluk nu'udar dezeju/hakarak (Platão, 2000). Klamar sai fali fatin ba razaun (parte espirituál no intelektu ne'ebé lokaliza iha ulun), enerjia morál (forsa vontade, korajen, bravura ne'ebé lokaliza iha tórax – hirus-matan) no paixau (dezeju, impulsu no vísiu ne'ebé lokaliza iha parte kabun nian).

Bainhira Platão hatuur ida-ne'e, permite estabele relasaun ida foun, katak moras sira mosu tan ba iha kontráriu entre *psyché* no *soma* – nu'udar pensamentu komún iha época ne'ebá –, maibé mós tanba konfliktu sira-ne'ebé iha klamar nia laran rasik (Platão, 2002). Prazér la iha kontrolu, sente moras maka'as liu, bulak, ignoránsia, halai hosi problema no buat hirak seluk, sai nu'udar moras ba klamar no afeta ema nia kapasidade atu rasiosíniu. Maske isin la iha moras, bainhira klamar moras sei afeta ba isin.

Ba Platão, hatene mak hanoin-hetan ka lembra, tanba ita labele hatene buat ida-ne'ebé ita seidauk koñese ka ita seidauk iha referénsia ruma. Maibé, oinsá halo ne'e se Platão afirma tiha katak isin nu'udar superfisiál, sentidu sira iluzóriu no ideia la depende ba esperiénsia imediata? Tuir Platão, resposta iha hela *psyché*/klamar mak, tanba imortál no pertense ba mundu ideia nian, bele lori ita ba hatene esénsia loloos ema nian. Hanoin hikas fali liuhosi dalan rasionál, lójika no dialétika halo ita liga ho memória, lembransa no reminisénsia pasadu nian ne'ebé hela iha *psyché*/klamar.

ARISTÓTELES NO RELASAUN ENTRE ISIN NO KLAMAR

Aristóteles (384/3-322 m.K.) moris iha sidade grega Estagira. Ninia inan mak Féstia, no ninia aman mak Nicómaco, nu'udar médiku partikulár ba liurai Amintas II. Bainhira Aristóteles tinan 10, ninia inan-aman mate no nia bá hela ho ninia biin-boot iha sidade Misia. Bainhira tinan 17, nia tama iha eskola *Academia* Platão nian, no estuda iha ne'ebá durante tinan 20. Aristóteles, depois Platão mate, sai husi *Academia* no halo viajen ba rai barak. Nia nu'udar profesór ba Alexandre o Grande, liurai Macedónia ne'ebé ukun impériu boot no koñesidu iha tempu antigu nian. Iha 335/4 m.K., Aristóteles fila fali ba Atenas no hari'i ninia eskola filozofia ho naran *Liceu*, hanesan omenajen ba *Apolo Lyceum*.

Aristóteles, iha ninia estudu *Sobre a Alma* (2010), sistematiza tratadu kona-ba *psyché* ida ne'ebé sai koñesidu iha mundu Osidental ba dahuluk. Iha ensaiu ne'e, Aristóteles propoin katak isin la ketak hosi *psyché*/klamar. *Psyché* no isin forma unidade ida, ne'ebé iha substánsia hanesan, ida la bele eziste se kuandu ida seluk la eziste. *Psyché* korresponde ba esénsia husi buat sira hotu ne'ebé iha, no nia mak halo buat ida-idak sai hanesan úniku no individuál. Klamar nu'udar imaterial, huun ba moris nian, huun ba karaterística no atividade sira ema ida-idak nian. Isin nu'udar ilas *psyché* nian. Aristóteles iha vizaun naturalista, prátika no funsional kona-ba klamar no isin. Ida ne'e relaciona ho ninia hanoin katak buat hothotu ne'ebé existe halo parte ba mundu sentidu sira nian, tanba ita bele hatene de'it saida mak ita nia sentidu sira hetan.

Aristóteles dehan katak klamar iha *faculdade* oioin, mak hanesan: *nutritiva*, *perceptiva*, *desiderativa*, *deslocação* no *discursiva* (Aristóteles, 2010). Karaterística sira-ne'e nu'udar potência klamar nian, no bele sai nu'udar acto ka la'e. Ne'e dehan katak potência mak possibilidade atu eziste, kapasidade atu hala'o buat ruma; enkuantu acto nu'udar ezisténsia konkreta no objetiva buat ida nian. Tuir Aristóteles, buat moris hotu-hotu iha klamar, maibé la'ós hotu-hotu iha *faculdade* klamar nian ba *acto*. Porezemplu, ai-horis iha *faculdade nutritiva*, maibé la iha lokomosaun, balada sira iha kapasidade lokomosaun, maibé la iha *discursiva*. Ema de'it mak iha *faculdade* hotu-hotu klamar nian.

É evidente que a alma é acto no sentido em que o é o saber: é no ente em que a alma existe que existem quer o sono, quer a vigília, e esta é análoga ao exercício do saber, enquanto o sono é análogo à posse deste sem exercício. [...] Não é preciso, por isso, questionar se o corpo e a alma são uma única coisa, como não nos perguntamos se o são a cera e o molde, nem, de uma maneira geral, a matéria de cada coisa e aquilo de que ela é a matéria. É que, dizendo-se «um» e «ser» em vários sentidos, «acto» é o sentido principal. [...] Que a alma não é separável do corpo, ou pelo menos certas partes dela não são – se é que a alma por natureza é divisível em partes –, isso não levanta dúvidas, pois o acto de algumas <partes da alma> é o acto das partes mesmas <do corpo>. (Aristóteles, 2010, pp. 62-63).

Nune'e memória, razaun, kriatividade, imajinasau, mehi, hakarak, hirus, ansiedade, domin, korajen, vontade, ta'uk, haksolok no hirak seluk hola-parte iha *psyché* no hatudu liuhosi isin. Tuir Aristóteles, intelecto hanesan *faculdade* ida *psyché* nian ne'ebé sai hanesan karakteristikata ema nian. Ba nia, intelecto nia funsaun mak buka koñesimentu liuhosi hanoin lójiku no uza razaun. Aristóteles fahe intelecto ba parte rua: ida mak parte prátiku, ho objetivu espesífiku, nu'udar kontestual, ne'ebé reaje iha situaun ruma no koko atu organiza informasaun sira-ne'ebé simu liuhosi sentidu sira. Ida seluk mak parte espekulativa, teorética ka kapasidade atu halo análise, organiza no estrutura conseitu no ideia sira-ne'ebé intelecto prátiku hanoin tiha. Ho liafuan badak, *psyché* nu'udar huun ba buat hotu-hotu ne'ebé moris, iha *faculdade* karakteristikata espésie ida-ida nian, no intelecto hanesan *faculdade* ida *psyché* nian liuhosi ne'ebé *psyché* hanoin no analiza mundu.

AVICENA: ALMA RACIONÁL, INTELEKTU NO HATENE AN RASIK

Ibn Sīnā, ka Avicena ne'ebé koñesidu iha Osidente, moris iha 980 h.K. iha Afshana (aldeia ida besik Bukara, ne'ebé nu'udar tiha kapitál ba Dinastia Persa – Semânidas nian) no mate iha 1037 h.K., ne'ebé hakoi iha sidade Hamadan. Nu'udar oan hosi Setareh no Abdullah, ne'ebé nu'udar matenek-na'in no polítiku ida-ne'ebé servisu ba governu Dinastia Persa Semânidas nian. Foin-sa'e Avicena hetan edukasaun di'ak no iha asesu ba

livru sira kona-ba filozofia, kultura no relijiaun. Nia iha interese ba lójika, étika, astronomia, metafizika, medisina, múzika, botánika, fízika no asuntu hirak seluk. Avicena hakerek livru atus resin kona-ba tema oioin. Ninia livru *Cânone da Medicina* (hakerek kona-ba anatomia, fisiolojia, tipu moras sira no hirak seluk) utiliza tiha iha Osidente durante sékulu barak no ninia obra filozofia nian buka atu halo sínteze ida ba teolojia musulmana no hanoin Platão no Aristóteles nian.

Avicena estuda filozofia gregu nian ho interese espesial ba metafizika Aristóteles nian. Alein ida-ne'e, nia hetan influénsia hosi filózofu Al- Fārābī, nu'udar pensador prisipal ida árabe nian iha tempu ne'ebá. Filózofu persia ne'e prodús tiha serbisu balu mak hanesan livru *Kitāb al-Nafs*, ka *Livro da Alma* (Avicena, 2011). Liafuan árabe *nafs* bele signifika 'klamar' no 'ha'u' no bele utiliza sira hanesan sinónimu. Ne'e hatudu interese Avicena nian hodi hetan esénsia no 'ha'u' loloos ema nian.

Avicena preokupa liu hodi buka define substánsia alma nian. Ba filózo-fu ida ne'e, *psyché*/klamar iha substánsia diferente ho isin. Ne'e dehan katak *psyché* no isin nu'udar buat rua ne'ebé ketaketak, maibé interliga no kompleta malu. *Psyché*/klamar nu'udar kauza ba movimentu, sentimentu, konteúdu no organizaun isin nian, maibé la'ós hanesan parte ida isin nian. Nune'e, ema sai unidade ida no ser vivo ka buat moris ida liuhosi relasaun entre isin no klamar. Atu ilustra dualizmu entre isin no klamar, Avicena propoin halo esperimentu mental ba '*homem suspenso no espaço*':

Dizemos, pois, é preciso que um de nós conjecture como se tivesse sido criado – e criado perfeito –, mas de modo súbito. Contudo, ele estaria eclipsado em sua visão, [daquilo que] provém das cenas exteriores. Teria sido criado [como se] caísse no ar ou no vácuo; a cair sem que, por choque algum, devesse sentir a consistência do ar a chocar-se com ele. Seus membros estariam separados entre si, sem se encontrarem, nem se tocarem. Bem, em seguida, pensar-se-ia: será que ele constataria a existência de sua essência, sem duvidar, em sua constatação, de que sua essência é existente, apesar de não constatar com isso [nem] a extremidade de seus membros, nem o interior de suas vísceras, nem coração, nem cérebro, sequer coisa alguma do exterior? Melhor, constataria sua essência sem constatar que ela [não] teria [nem] comprimento, nem largura, nem profundidade? E, se nesse caso lhe fosse possível imaginar uma mão – ou um

outro membro –, não a imaginaria [como] parte de sua essência nem [como] uma condição quanto à sua essência? Ora, tu sabes: aquilo que é constatado é distinto daquilo que não se constata; e nisso o que é incontestado é diferente daquilo que não se atesta. Logo, a essência que constata sua existência possui uma propriedade para isso, na medida em que ela é, em sua especificidade, distinta de seu corpo e de seus membros que não constata[m] [suas próprias existências]. Portanto, o que é constatado é para ele [tal homem] uma via para que se lembre de que a existência da alma é algo distinto do corpo, melhor, é incorpórea. Ele é conhecedor desse seu pressentimento. Agora, se ele for um insensato diante disso, será preciso censurar sua desobediência. (Ibn Sīnā, 2011, p. 42).

Klamar iha sentidu tolu, hanesan *faculdade* (asaun no kapasidade ne'ebé nia iha), *forma* (isin materiál ne'ebé nia okupa, ne'ebé bele minerál, vegetál ka animál) no *perfeição* (ne'ebé la presiza isin materiál atu eziste, no nia mak nu'udar kauza ba isin book-an no hakle'an kbiit ema nian haktuir ninia karaterístika espésie nian). Avicena dehan katak *intelecto* (razaun, pensamentu, kapasidade atu hatene no hirak seluk) hola-parte ba *faculdade* husi alma racional ema nian. *Intelecto* bele sai *prático* (relasaun ho estímulo liur no laran ne'ebé organiza ita-nia asaun sira, analiza ambiente ne'ebé haleu ita no ajuda ita foti desizaun no moris); no *teórico/especulativo* (kapasidade atu imajina buat ne'ebé lakoñese, espekulasaun, abstrasaun no hanoin metafiziku). Maibé intelecto la'ós klamar, nia nu'udar *faculdade* ida klamar nian. *Intelecto* mak responsável ba koñesimentu ba an, liuhosi kestiona ba sé mak ita no hatene ita-nia an rasik (Ibn Sīnā, 2011). Nune'e, klamar eziste tanba nia hatene katak nia eziste, ka, klamar hanoin no komprende nia an rasik.

Avicena dehan katak iha *ser* (buat hotu-hotu ne'ebé eziste hanesan ai-horis, balada, ema no hirak seluk) no *ser impossível*, ne'ebé nu'udar ideia no hanoin kona-ba buat ruma ne'ebé eziste de'it iha mundu konseitu sira nian. Ser bele fahe ba *ser necessário* mak buat ida-ne'ebé halo buat hotu book-an, nu'udar kauza ba buat sira hotu, no eziste nafatin (uluk, agora dadaun no iha futuro); no *ser possível* mak ida-ne'ebé bele eziste materialmente ka la'e, no bele simu nia ezisténsia liuhosi buat seluk. Liuhosi hanoin ida-ne'e, Avicena halo diferença entre esénsia (buat ne'ebe eziste ne'e) no ezisténsia (matéria hosi

buat ida nian). Klamar nu'udar tipu husi *ser necessário por intermédio de outro*, tanba iha esénsia rasik, maibé ninia ezisténsia relasiona ho isin. Klamar, liuhosi *faculdade intelecto* nian, iha razaun, hanoin no kbiit atu analiza. Tuir Avicena, ho de'it razaun, hanoin lójiku no observa direta ba faktu sira mak bele lori ita ba lia-loos no hatene realidade buat hotu-hotu nian.

SÃO TOMAS DE AQUINO, INTELIJÉNSIA NO KAPASIDADE BA KOÑESIMENTU

Tomás de Aquino moris iha 1225 h.K. iha Aquino iha reinu Sicília no mate iha 1274 h.K. iha Fossanova (Itália). Tomás de Aquino nian inan-aman mak Landulfo Aquino no Teodora, ne'ebé nu'udar oan hosi nobre-italia ne'ebé dedika ba servisu militar. Bainhira sei foinsa'e hela, Tomás de Aquino desidi atu tama iha orden dominikanu. Maibé ninia família lakohi nia hili ida ne'e no sulan nia iha kastelu família nian kuaze tinan ida. Depois konsege halai-sai, Tomás de Aquino bá tiha Roma no tama ba *Ordem dos Pregadores*. Nia dedika an ba hanorin iha universidade no estudu teolójiku no filozófikku.

Konsidera hanesan komentador prinsipal ba Aristóteles nia filozofia, nia buka halo relasaun entre hanoin Aristóteles nian ho fiar katólíka nian. Ninia obra prinsipal no ida-ne'ebé mak fó influénsia ba pensamentu Osidental nian mak *Suma Teológica*. Pensador sira-ne'ebé fó influénsia liu ba Tomás de Aquino nia obra mak Averróis, Avicena, Maimônides no Santo Agostinho.

Tomás de Aquino dehan katak klamar nu'udar esénsia ba buat sira ne'ebé moris hotu, ka, nia nu'udar huun moris ba ai-horis, balada no ema sira. Klamar nu'udar kauza, prinsipiu ba ita-nia movimentu, hanoin no pensamentu. Ema nia klamar mak substánsia intelektu nian, imaterial (la'ós matéria), inkorrup-tivel no imortal (la mate) ne'ebé liga malu ho isin-lolon material no mortal. Tomás de Aquino koko konsilia ninia ideia kona-ba klamar ema intelektuál nian ho teolojia katólíka nian, hodi dehan katak klamar (forma) la depende ba ba isin (matéria) atu eziste, maibé liga hamutuk ho isin hanesan substánsia ida de'it hodi realiza an ho kompletu.

Tuir nia, klamar iha *potência* oioin, ne'ebé la'ós klamar, maibé ninia virtude balu. *Potência* sira nu'udar probabilidade ka buat ida-ne'ebé sei bele eziste, enkuantu acto sira mak buat ne'ebé eziste ona. *Potência* sira-ne'e la independente, la funsiona mesak, maibé nu'udar asaun sira klamar nian rasik ne'ebé bele mehi, sente, hanoin, book-an no hirak seluk. *Potência intelectual* nu'udar karakterístika eskluziva ema nian (animál no ai-horis, maske iha vida, la iha intelektu). *Potência intelectual* ema nian mak responsável ba memória, matenek, konxiénsia, potência pasiva, intelektu ajente, espekativu no prátiiku. Intelektu iha kapasidade atu reflète no hodi koñese an rasik.

Intelijénsia nu'udar *faculdade* ida-ne'ebé aas no kompleksu liu ba ema nia klamar. Intelijénsia nu'udar acto ida (buat ne'ebé eziste) hosi *inteligência intelectual* (ne'ebé bele eziste). Liu hosi inteligénsia ita bele koñese realidade ne'ebé haleu ita, lia-loos universal sira, bele abstrai, komprende mundu ne'ebé la'ós matéria no hanoin kona-ba signifkadu ezisténsia nian, bein, infinitu (buat ne'ebé la iha rohan), maromak no buat hirak seluk. Maibé, la'ós inteligénsia mak hatene buat ida, maibé klamar mak hatene liuhosi *potência intelectual*. Tomás de Aquino dehan iha *Tratado sobre o Homem*:

Deve-se admitir que o intelecto, princípio da operação intelectual, é a forma do corpo humano. Pois, aquilo que faz, primariamente, com que um ser opere, é a forma do ser ao qual se atribui à operação. [] Ora, é manifesto que a alma é o princípio primário da vida do corpo. E como a vida se manifesta por operações diversas nos diversos graus de viventes, aquilo que produz, primariamente, cada uma das obras da vida é a alma. Pois é pela alma que, primariamente nos nutrimos, sentimos, movemo-nos localmente e, semelhantemente, inteligimos. Logo, esse princípio pelo qual primariamente inteligimos, quer se chame intelecto, quer alma intelectual, é a forma do corpo. (Primeira parte, q. 76, art. 1, 2002).

Maibé, maske ema bele harii ninia istória rasik liuhosi saida ne'ebé nia hili no asaun ne'ebé nia halo, koñesimentu sei hetan mediasaun liuhosi sentidu, kontatu ba mundu liur. Ne'e dehan katak klamar koñese mundu liuhosi informasaun ne'ebé nia simu hosi sentidu lima, atividade lora-lora nian, hosi relasaun entre kauza no efeito hodi to'o ba ideia sira. Atu ita komprende buat ida, prezisa atu buat ida-ne'e nu'udar material, nu'udar acto (buat ne'ebé eziste). Maibé, tanba *potência intelectual* no inteligénsia, ita bele

abstrai, hanoin liu tiha saida mak ita haree, hatene signifkadu diferente sira-ne'ebé ita haree, mehi, transende ka ultrapassa tiha mundu materiál, reflète kona-ba konseitu abstratu sira, kona-ba imajen ne'ebé la réal (la iha matéria), koñese realidade no buat ne'ebé ultrapasa mundu sentidu lima sira nian, mak ita foin bele alkansa koñesimentu.

DESCARTES NO 'HA'U HANOIN, MAK HA'U IHA'

René Descartes moris iha Fransa iha 1596 h.K. no mate iha Estocolmo iha 1650 h.K. Nia nu'udar oan hosi família noble ida no bainhira nia sei ki'ik, hafoin ninia inan mate, nia bá estuda iha eskola jezuita nian. Hafoin remata estudu nia halo viajen ba rai oioin no tama iha militár. Depois nia fila hikas ba Paris hodi hahú estuda filozofia, matemátika no fízika. Nia hakerek tiha livru no ensaiu barak, balu mak *O Discurso do Método, As Meditações Metafísicas* no *Os Princípios da Filosofia*.

Descartes dehan katak klamar, ka *mente*, mak prinsípiu ba hanoin nian. Klamar ne'e hanesan buat ida ita labele fahe, no nia mak huun ba rasiósinu, neon no reflexaun nian. Isin, iha sorin seluk, hanesan matéria (okupa espasu ida), divizível ka bele fahe no iha tipu oioin. Nune'e klamar no isin la'ós buat ida hanesan. Descartes nia filozofia mak dualista bazeia ba divizaun entre hanoin (esénsia) no isin/matéria (estensaun). Klamar nu'udar substánsia ida ne'ebé ninia huun ka esénsia mak pensamentu. Descartes konsidera substánsia hanesan buat ida-ne'ebé ezisti rasik no nu'udar huun ba movimentu no buat hirak seluk nia ezisténsia. Nune'e, 'ha'u' nu'udar substánsia ida-ne'ebé hanoin, tanba serteza ida-ne'ebé mak ita iha katak ita hanoin.

Nia buka koñesimentu liuhosi *dúvida metódica*. Ne'e dehan katak ba Descartes buat ida laloos bainhira seidauk iha prova konkreta ida. Tuir Descartes ita tenke duvida ba buat hotu, ita-nia sentidu sira, matemátika, objetu no hirak seluk. Maibé bainhira ita duvida ka laiha serteza ba buat ida, ne'e dehan katak eziste ema ida mak duvida. Ita la bele dehan sé mak ne'e no oinsá ema ne'e, maibé ita bele hatene katak ema ne'e existe, tanba nia hanoin. Lójika ida-ne'e hatudu liuhosi fraze "ha'u hanoin, mak ha'u iha".

E, por conseguinte, este conhecimento eu penso, logo existo é, de todos, o primeiro e o mais certo a ocorrer a quem quer que filosofe com ordem. E este é o melhor caminho para vir a conhecer a natureza da mente e a sua distinção do corpo. Pois, ao examinar quem afinal somos nós, que supomos serem falsas todas as coisas que são diversas de nós, vemos nitidamente que nenhuma extensão, figura, movimento local ou algo semelhante a se atribuir ao corpo pertence à nossa natureza, mas só o pensamento, que por isso é conhecido antes e com maior certeza do que qualquer coisa corpórea, pois este já percebemos; das outras coisas, porém, ainda duvidamos. (Descartes, 2002, p. 27).

Iha Descartes nia filozofia, ideia sira hanesan reprezentasaun mental, maihosi konxiénsia. Iha ideia tipu tolu, ka, *inatas* (ne'ebé la prezisa esperiénsia, moris iha hanoin rasik, nu'udar ezemplu ideia kona-ba Maromak), *facticias* (mak sira-ne'ebé inventa iha hanoin, fantazia, imajinasaun, ne'ebé la hola parte iha esperiénsia imediata) no *adventicias* (mak sira-ne'ebé mosu liuhosi esperiénsia sira sentidu nian). Razaun ka bom-sensu nu'udar kapasidade atu julga loloos, hodi bele haketak buat loos no falsu, sala no loos. Razaun mak organiza ideia sira no haketak buat ne'ebé réal no la réal.

PSYCHÉ, INTELEKTU NO KOÑESIMENTU

Hanesan ita haree ona, pensadór (matenek-na'in) barak mak durante is-tória humanidade nian preokupa ho pergunta kona-ba: Sé mak ha'u? Oinsá ha'u bele hetan koñesimentu? Tansá ha'u hanoin? Saida mak ha'u-nia hanoin sira? Tansá ha'u halo, ha'u sente no ha'u hanoin ho maneira ida-ne'e no la'ós hanesan ida seluk? Kestaun hirak-ne'e, psikolojia moderna mós buka atu hataan.

Nosaun kona-ba *psyché* utiliza tiha hanesan huun ba moris, buat ida-ne'ebé halo buat sira ne'ebé moris book-an. *Capacidade intelectual* nu'udar karaterística ida *psyché* nian ne'ebé haketak ema ho buat moris hirak seluk. Kestaun ida-ne'ebé autór sira konkorda hotu mak koñesimentu mosu de'it bainhira ita hanoin, ita husu no ita buka atu komprende ita-nia an rasik no buat hotu-hotu ne'ebé haleu ita. *Psyché*, ne'ebé psikolojia moderna asosia hanesan mente no razaun, nu'udar dalan ida atu ita bá to'o koñesimentu kona-ba ita-nia an rasik.

Ba ida-ne'e, ita prezisa proativa no la bele tuir de'it ema seluk nia orden no regra hirak-ne'ebé sosiedade determina. Ita prezisa husu, duvida no buka orijen sira hosi ita-nia fiar, lia-loos, serteza, valór, kostume no toman. Tan ne'e, reflexaun lójika, buka komprende ita-nia pasadu, halo análize ba ita-nia realidade atuál, kestiona ita-nia serteza rasik no hateke ba ita-nia an rasik, sei bele ajuda ita atu iha liutan konxiénsia no dezenvolve an ho tomak. Siénsia psikolójika nia objetivu ida mak atu komprende kompleksidade ema nian no ajuda ema ba iha prosesu atu hatene an rasik. Nune'e, sai nu'udar fundamentál atu komprende oinsá ita-nia mente funsiona no orijen hosi ita-nia hanoin no sentimentu sira.

REFERÉNSIA

- Abib, J. A. D. (2009). Epistemologia pluralizada e história da psicologia. *Scientiae Studia*, 7 (2), pp. 195-208.
- Apuleio, L. (2000). *O Asno de Ouro*. Rio de Janeiro: Ediouro.
- Aquino, T. (2002). *Suma Teológica*. São Paulo: edições Loyola.
- Aristóteles. (2010). *Sobre a Alma*. Lisboa: Imprensa Nacional Casa da Moeda.
- Descartes, R. (2002). *Princípios da Filosofia*. Tradução de Guido Antônio de Almeida, Raul Landim Filho, Ethel M. Rocha, Marcos Gleiser e Ulysses Pinheiro. Rio de Janeiro, Editora UFRJ.
- Ibn Sīnā (Avicena). (2011). *Livro da Alma*. Tradução do árabe, introdução, notas e glossário de Miguel Attie Filho. São Paulo: Globo.
- Platão. (2000). *Fedón*. São Paulo: Nova Cultural.
- Platão. (2002). *Timeu e Crítias ou a Atlântida*. Curitiba: Hemus.
- Schultz, D. P., & Schultz, S. E. (2016). *História da Psicologia Moderna*. São Paulo: Cengage Learning.

Direitos Autorais (c) 2019 Alessandro Boarcaech



Este texto está protegido por uma licença [Creative Commons](#)

Você tem o direito de Compartilhar - copiar e redistribuir o material em qualquer suporte ou formato - e Adaptar o documento - remixar, transformar, e criar a partir do material - para qualquer fim, mesmo que comercial, desde que cumpra a condição de:

Atribuição: Você deve atribuir o devido crédito, fornecer um link para a licença, e indicar se foram feitas alterações. Você pode fazê-lo de qualquer forma razoável, mas não de uma forma que sugira que o licenciante o apoia ou aprova o seu uso.

[Resumodalicença](#) [Textocompletodalicença](#)